

Хәнты ясәң,



Основана
1 ноября 1957 года

05.08.2021
№ 15 (3579)

Шуши мир ёмәңхәтл һила!



Тәк кәртән вәлты ими Анастасия Петровна Новьюхова (Миляхова).
И. Самсонова вәрум хур

Кәсүпсыя
рәпаратайт китты
питсыйт

» 3

Павел Янчевич
Айваседа
80 ода йис

» 7

Тунты эвәлт
воńщуп
па хинт
ёнтлүв

» 9

Апраң хәрни
(хәнты
моньщ)

» 15



Округ кәща н€ Советской районан вәс

Вәш тыләш 30-мит хәтлән Наталья Комарова Советской районан мирхот вәрәс. Щит тәсәт «Содействие» нәмпи социальной па благотворительной вәрәт тәты тәхи кәща н€ Татьяна Байкарова, блогер Индира Шибанова па оса вәрәт тәты н€ Вера Богдан.

Мирхотн онлайн ширн мәнәс. Щата путәртәт, хутыса Советской район хүваттын национальной проекттәт рәпитетләт, районан вәлты мир кәща н€ мосты вәрәт оләңән иңьәссәт.

Округ кәща н€ лупас:

» Советской районан вәрәт яма мәнәт, мулты нүшайт ки вәлләт, кәща ёх иса вантман тайләт, щиттәт түңматләт. Тата мир щимәц мәт вулаң па мосты вәрәт оләңән лупләт – хәннәхәйта рәпата мәтвәр, рәпитетты тыләш вухät, айлат ёх пәта оса вәрәт тәты щир.

Щәлта Советской район кәща Игорь Набатов путәртәс, хутыса национальной проекттәт тата рәпитетләт, хотат омәсты па мира мәтвәр тәләйт.

2021-мит олн Советской район хүваттын хәт национальной проект тәләти: «Демография», «Культура», «Навремәт вәнләттәти вәр», «Малое и среднее предпринимательство и поддержка индивидуальной предпринимательской инициативы», «Мұвәт-автәт ләвәлтү вәр», «Хотат омәсты па мира мәтвәр».

И. Набатов щирн, щата ләнхадәт ешавәл навремәт хәтләт мәр тәйти не-государственной хотат пүншты. Алябьевской кәртән навремәт юннты



▲ Мирхот пурайн. admhmao.ru сайт эвәлт вўюм хур

хәр омәссы, ГТО пәта кат хот вәрсы. Советской вошн парк омәссы, хута спортивной мосты щүңкәт вәрсыйт.

Районан пәльницидайт пәта йилуп мосты щүңкәт па «Скорая помощь» нәмпи хәлум машина дәтсыйт.

Советской вошн ўшкола №1 хущи «Образование 4.0» нәмпи проект тәләти. Щи унтасн навремәтйилуп ширн вәнләттәйтүләттә питләт.

» *Ма ләнхадум лупты, Советской политехнической колледж – щит мүн округевн па па мүвәт киньши мәт яма рәпитеттәти тәхи. Лыв WorldSkills нәмпи кәсүпсүйн кимит тәхи холумсәт, – лупас Игорь Набатов.*

2020-мит олн щата 36 щурас квадратной мәтра вәлты хот омәссы, 291 семья йилуп хота касәлсәт. Мосл лупты, Советской район округевн вет тәхи күтн хәншман вәл, хута

мет ар вәлты хот омәсләт.

» *Мүн ләнхадуй 2022-мит ол етшәтү вәнты вевтам хотатн вәлты хүятата иса йилуп хотат мәтвә, мәтвә хотат 2017-мит ол вәнты вевтам хотата лўнгәтсыйт, – лупас район кәща.*

2020-мит олн Советской районан нивл оса хәр йиллапты. Тәм 2021-мит олн па нивл щимәц тәхи ёхтын лыв рәпитетләт.

И. Набатов лупас пәмашипа яснәт округ кәща нәңа, хуты Советской район бюджета 2019-мит ол мәнум юпийн ишакты щира вухат мәсыйт. Щи унтасн районан арсыр проекттәт тәләйт, ләлн мир вәлты щират нух алуумты.

«Созвездие» тәхи кәща хә Олег Васянин ясәнләл, щирн, мет ям, хуты округ мирава вухән нётупсәт мәлдәйт. Щи унтасн Советской вошн «Память» нәмпи экспозиционно-

выставочной хот омәссы.

Щәлта мирхот пурайн ясн мәнәс Советской районан хущи рәпитеттәти тәхет оләңән. «Самза» нәмпи лесопромышленной тәхи кәща Сергей Смышляев путәртәс, хутыса щи тәхи рәпител. 2019-мит олн щи тәхия мосты щүңкәтләтсыйт, щи вәра 160 миллион шойт вух мәссы. Лыв лупас:

» *Щи вухат унтасн мүн юх эвәттә мосты щүңкәт ләтсүв. Интәм тата тыләш мәр 1200 кубической метра юх эвәттә, щитумпи 200 кубической метра павәрт ләщәттә.*

Щи тумпи лыв юх эвәлт хотат, певәлт хотат омәсләт. 2020-мит олн Коммунистической кәртән кәт семья вәлты пәта хот омәссәт.

Юхи хашум артән мирхотн «Бобр в Картопье» нәмпи вәр оләңән путәртәт. Лыв ләнхадәт Советской вошн Картопья микрорайон хуща рүтүштәти хәр омәсты, ләлн щата навремәт юннты, айлат ёх па па иса хүятат рүтүштәти щир ат тайсат. Арсыр мосты щүңкәтшәтә вәртә питләт.

Наталья Комарова Советской районан вәлты хүятата пәмашипа ясн лупас, иса мосты вәрәт ёх еллы рәпитеттәти питләт.

Хәнты ясәнә тулмащтас:
Надежда Новьюхова



Кাসупсыя рәпаратайт китты питсыйт

Айдат ёх пәта вәрум «Йис кәртәт вәлүпсы» кাসупсыя, мәта ут хәнты, вухаль, юрн ясңәтн дәштәтлы, няврәмәт хәншум путәрләл китты питсәт. Щит Сүмәтвош, Нуви сәңхум районнан па Ёмвош эвәлт пушхат хәншасат.

Тәм кাসупсы 2021-мит ол ай тәхет потты тыләшш олән хәтл вәнты мәнты питл. Округевн вәлты няврәмәт хәншум путәрләл щив китты вәритләт. Щит кәт щирн лүңәтты питлы: 7-12 тәл луват па 13-18 тәл луват айдат ёх.

Кাসупсын хәнты, вухаль па юрн ясңәтн ай рәт кәртәт оләнән хәншум путәрләт нух вантлыйт па щиттәт рүш ясәңа тулмащтәты мосл.

Хәншум рәпаратайт «Хәнты ясәң» па «Луима сәрипос» редакция тәхия китты мосл: 628011, Ёмвош, Комсомольская вош хулы, 31-мит хот, 501-мит хот ийт (приёмной). Муй па электронной адрес мухты:



▲ Н. Рагимова вәрум хур

khanty.mansi.mir@gmail.com.

Мосл лупты, хуты тәм касупсы мүң вәрсүв, ләлн округевн вәлты мир шуши ай кәртәт оләнән уша ат вәрсәт па хәнты, мон-

сән, щив яңхты нумәсн юхәтлыйт. Щи тумпи, рәт ясңев шавиман па ләвәлман тәйти пәта иши тәм касупсы мосл.

Тәм касупсы общественной па внешней связят

департамент, мүң хәнты па вухаль ясәңәнән ётты газетайңәлүв па «Югра» телерадиокомпания ёх ияха пилтәщман вәрсәв.

Мулты ут уша паватты ләнхалаты ки, тәм телефонат мухты па тәм хүяттәт эвәлт иңьшәстү вәритләт:

- ◆ **8 (3467) 33-36-07**
Л.Гурьева, И.Самсонова;
- ◆ **8 (3467) 33-23-09**
В. Узель, Л. Теткина, С. Ромбандеева.

Хүйтат нух питләт, ай тәхет потты тыләш 15-мит хәтл вәнты уша иил.

Муй щирн рәпаратайт китты тәлта уша вәраты: <https://khanty-yasang.ru/news/12423>

Хәнты ясәңа тулмащтас: **Надежда Вах**

Пиресты вәртәт ләштәтты оләнән

Тәта мосванән, вәщ тыләш 27-мит хәтәлн, Ёмвошн РИЦ «Югра» нәмуп айкеလәт ёкәтты тәхийн миҳот мәнәс.

Щи пурайн пири-сүпсәт округев луватн вәрты кәща хә Д. Корнеев, Югра мүвев Общественной штаб тәхи кәща нә О. Сидорова, щәлтә па «Независимый общественный мониторинг» тәхи кәща хә С. Розенко, округев хүватн вәлты «Единая Россия» партия тәхи секретарь хә Б. Хохряков па Дума хот ЛДПР тәхи кәща хә В. Сысун путәртсәт, муй щирн лыпәт хойты тыләшн пиресты вәртәт ләштәтты.

Щи вәр тумпийн ияха юхтум кәшайт путәртсәт, хуты ѫл хәннәхүяттәт коронавирус мәш вәр эвәлт пириты пурәлн ләвәлман тәйти мосл.

Сырыя айкеလәт ёкәтты ёх елпийн О. Сидорова лупас, муй щирн лыв сырсыр пиресты вәртәт тәта ләштәттәт. Ай кәр тыләшн мәтты общественной тәхет арталаты хәннәхүяттәт хулыева ияха ёкәтсәйт. Вән кәр тыләш вүш эвәлт па иса лыпәт тыләш вүш вәнты лыв щимаш хүяттәт нәмасия ар щирн вәрты пириты тәхетн мәнты рәпаратайт вәнләтсәт. Щәлтә, щи вәр тумпийн, вәйт ләр тыләшн ишти наблюдатель щирн ѡн вәнлүтум ёх еллы пириты вәртәт вәрты щира вәнләттәт питләт.

О. Сидорова лупас, хуты пири-сүпсәт ләштәтты хәтләтн лыв хәннәхүятләл

пириты тәхета юхәтты хүяттәт коронавирус мәш вәр эвәлт иса ләвәлман тәйти вүтъщәләт.

Д. Корнеев па путәртәс:

» Общественной наблюдение Россия хон пәләк луватн вәрты вәр – щит шенк вудан па мосты вәр. Щит унтасн, вантә, кашән ай муй па вән пириты вәр иса яма, вешката тәм йисн ләштәтты питла.

Оса тәхет рәпаратайт, иса мониторинг щирн йилпа вәрум тәхет ин тәмхәтл вүш эвәлт шенк тәса рәпилтәт.

Щәлтә 87 процент Югра мүвән хәннәхүяттәт

пири-сүпсәт ләштәтты тәхет хуща видеорегистратор нәмуп машинаитн нух хәншасит.

Кашән ай кәртән муй вән вошән, хүв тәхийн вәлты пириты тәхетн тәм пулъяң па щимаш ви-деонаследие щүнкәт нәмасия вәрты питләйт, ләлн пири-сүпсәттүнцирәна ат мәнсәт.

Д. Корнеев ясәңдал щирн, лыпәт хойты тыләш 17-мит хәтл вүш эвәлт па 19-мит хәтл вәнты Югра мүвев луватн кәща ёх пириты вәртәт тәса па яма мәнты вәритләт.

Путар хәншас: **Владимир Енов**



Коронавирус мәш оләңән

Россия мүвевен коронавирус мәш эвәлт хәлум вакцина вәл. Интәм кашәң, хәннөхә щит ут һоньщаты щир тайл. Ешавәл па хәннөхә пириты питл, мәта пүртән һоньщаты ләңхәл. Кашәң хәтл, ар хуят прививка вәрләт, тәп щи күтн интәм ар хәннөхә щи мәшн мәшилдәт.

Юхи хәшум пурайн няvrәм тайты имет күтн ар хуят щи мәшн мәшилтти питсәт. Хән ими няvrәм тайл, иммунитетл вевтама йил, щирн щи нәкоронавирус мәшн ла-вәрта кәшилт. Мәт ла-вәрта мәшилдәт щи нәңәт, мәтайт турәх, сәм, вәрк, мухәл муй па онко мәштәт тайләт.

Әңкел эвәлт няvrәма щи мәш ѿн юхәтл, тәп хән лүв сәма питл, әңкел, пила яха улман мәшилтти щир тайл.

Няvrәм тайты нәңәт интәм худыева јма па тәса вантлыйт.

Округев кашәң, хәтл мәт ар хәннөхә Сәрханл па Нижневартовск вош-нән мәшәңца йиләт. Нижневартовской пәльнице эвәлт айкел щирн, ёхәт һапәт мәр аршәк хәннөхә мәшилтти питас. Интәм ковид-центрат хуши 1144 мәшәң хәннөхә хәншман вәлләт. Турәх мәш 549 хәннөхә тайл, щит мәнум һапәт киньши 14,5 % аршәка йис.

Округев пәльнициятан прививкайт омаслайт, щи күтн рүтьщаты хәтләнән иши пуртән һоньщаты щир вәл.



Шаль, хуты интәм йилуп коронавирус штаммätтывасы: британской па индиjsкой. Хәннөхәйт ар щирн щи мәшн юхәтлайт, итәхәт лупләт, сәмңал кәшаңа йилнән, хунл мәшилт, охәтл.

Здравоохранения всемирной организация ёх

лупләт, ләлн иса ёх коронавирус мәш эвәлт пуртән ат һоньщатләт. Щи хутаты, хутаты сыры кәшилт, иши прививка омасты мосл. Щиты шимәлшәк хәннөхә щи утн мәшилтти питл.

Хәнты ясана тулмаштас: **Надежда Новьюхова**

Югра мүвевен 17 щурәс хәннөхә ВИЧ кәши тайләт

Тәта иса мир күтн 1 % хәннөхә щи атум мәшн мәшилдәт. Щи оләңән айкеләт әкәтты хутат елпийн путәртсәт «Центр-СПИД» тәхи вулаң тохтур хә Андрей Петровец, эпидемиологической отдел кәща нә Наталья Бугаева па профилактика отдел ух нә Анна Новоженова. Щата путәртсәт, хутыса щи атум мәшн юхтум ѿнки па лүв пушхәл ла-вәлт.



Наталья Бугаева щи оләңән лупләс:

» Округев хүббаттын ёхәт оләтн аршәк хутат щи атум мәшн мәшилтти питас. Тәта интәм 17 щурәс хәннөхә мәшәңца вәл. Хәннөхә имел муй икел пила вәлман щи мәшн юхәтләи. Мосл лупты, щи утн 40-49 ола ювум ёх аршәк мәшилдәт. 60 % хутат – щит хә ёх, 40% – имет. Имет имухты пәльниция юхәтләт лекшитыйлтышира.

«Центр-СПИД» тәхий леккарәт щи мәшн кәшилтум имет эвәлт сәма питум няvrәмәт тәса вантлыйт. Югра мүвевен 4795 щимәш няvrәм сәма питас. Интәм тәта ВИЧ мәш тәюм кәт щурәскәм няvrәм вәл.

Имет няvrәм тайты пурайн леккарәтн јма па тәса вантлыйт, щирн шимәлшәк няvrәм щи мәшн юхәтләйт.

2020-мит олн 16 нә кәшаңа йис, тәм олн – һапәт ими.

» Ёхәт пурайн мәт ар хәннөхә щи мәшн кәртәтн мәшилдәт, щата вәнләт ёх щи утн юхәтләйт. Баштн 30 ола ювум

ёх мәшәңца вәлләт. ВИЧ утн хойты ёх, мәтайт щи мәш эвәлт пуртән ѿн янышләт, иммунитет ѿн тайләт, лүв ванкүтлы арсыр инфекционной мәштәт эвәлт ѿнта ма-йиләт, щи күтн коронавирус мәш эвәлт. Йәм иммунитет тайты ёх арсыр мәштән ѿн кәшилтәт, – Андрей Петровец лупләс.

Лүв лупләс, щи мәш тайты хутаты коронавирус эвәлт прививка һоньщаты рәхл.

Кәща ёх лупләт, хуты тәм ол, хәт тыләш мәр мәнум ол киньши 4% шимәлшәк хәннөхә щи мәшн юхәтсыйт. Тәп коронавирус мәш эвәлт, ал-па, щи ёх аршәка йиләт. Мәнум 2020-мит олн пандемия пәта пәльнициятан шимәлшәк анализ вәрәнгтсәт.

2020-мит ол вүш эвәлт 55% лекшитум па вантум ёх күтн – щит нәңәт. Нәңәт ими тохтура юхәтман муй па медосмотр вәрман ВИЧ мәш оләңән уша павәтләт.

Николай Меров

хәншум айкел

хәнты ясана тулмаштас: **Надежда Рагимова**



Йилуп рәпата вәйтты рахл

Кашаң хәннәхәя вәлүпсәл хұват вух ёша павәтты пәта рәпитетты мосл, лўведа мосты рәпата вәйтты мосл. Щи вәрәтн рәпата кәншты хотн рәпитетты ёх нәтләт.

Рәпата кәншты хоттәт хәннәхәя мостәтәт рәпата вәйтты нәтләт, щи киньща лыв па сыр-сыр вәрәт вәрләт.

Мет мосты вәр, щит ёха путәртты, муй тәхетн рәпитетты хүяттәт вәра мосләт, муйсәр рәпата тәм хәтл вәра мосл. Щәлта па щи рәпатаита айлат ёх ашкода вүш эвәлт кәрәтты мосл. Лыв еша вәл ашкода эвәлт йира питләт, вәна йиләт, лывела рәпата мосл. Щи рәпата уша вәрты пәта, щи рәпата вәнләтүйләттәт пәта лыв хуты колледжән муй па вән нәпекән тәхийн еллы вәнләтүйләттәт питләт.

Вәнләтүйләттәт айлат ёх итәх пурайн иши йилуп рәпата кәншләт, лывела сыры рәпатаел мултты пәта ѣн мәстәл, щи пәта па тәхийн ләнхалаттәт рәпитетты.

Вәна ювум хәннәхуята та иши щи вәрәт мосләт, лыв хүв мәр итәхийн рәпитеттәт, ин па вәлүпсәв па щира кәрләс, катра рәпата тәхет ѣн мостәләт, щи пәта лывела йилпа мулттыя вәнләтүйләттәт мосл.

Ай нявләм тәюм имет ищты щи. Мултты тәхийн рәпитеттәт, айдал пила юлн омсум мәрелн щи рәпата тәхет тәхәрсайт муй па па щира кәрәтсайт. Имета йилуп рәпата мосл, йилуп щира вәнләтүйләттәт мосл.

Мосты рәпата вәнләттәттәт вәр - щит государства вана тәйттәттәттәт. Рәпата кәншты ёха ай павәтла, муй тәхийн мет рәпитетты

ёх мосләт, мәта тәхийн лыв пәкләт рәпитетты, муй тәхия щомел-кәмел вәл. Щи ѹпийн па щи, ёх мосты йилуп рәпата, еллы йама рәпитетты пәта вәнләтәләйттәт.

Рәпата кәншты хоттәт рәпитетты ёх йама нәтләт:

- ▶ лыв рәпата вәрәт одаңан путәртләт;
- ▶ нәпекмұхты уша вәрләт, мәта рәпата тәм хәннәхәя мәстәл;
- ▶ щәлта па щи хәннәхә пила путәртләт;
- ▶ юхтум хәннәхә уша вәрләлә, мәта тәхетн елдәттәт рәпитетты питл.

Рәпата кәншты хоттәт рәпитетты ёх йама вәләл, муй тәхийн рәпата мосл, муй вүрн щи рәпата ёша павәтты. Щи киньща па тәмәш тәхийн йама вантләт, кашаң хәннәхә муй тәхийн ләнхалаттәт рәпитетты, муйсәр рәпата пәкәл вәрты, муй тәхийн лув вәнләтүйләт.

Щиты ки хәннәхә пила путәртла, лув юм нумасн лўведа мосты па мәстәтәт рәпата кәншләт. Щәлта па щи рәпата вәнләтүйләт. Рәпата кәншты хота тәп нәпекәт тәттәт мосл, щирн щәтә лув хәншман тайты питләт.

Тәмәш государствен-ной вәрәтн хәннәхә вух ѣн сухуптәл, кашаң 14 ола ювум хәннәхә пәкәл щи тәхия мәнты па заявления нәпек хәншты муй па щи нәпек карты щүңқатт мұхты киттә.

Хән хәннәхә кашл ки вәл щив юхатты, лўведа «Ханты-Мансийский центр занятости насе-



▲ Айлат ёх рәпата кәншләт. Интернет эвәлт вўюм хур-

ния» тәхия мәнты мосл: Ханты-Мансийск вош, Карла Маркса вош хулы, 12-мит хот, 1 этаж, 1 хот ийт па тәмәш нәпекәт щив мәттә:

- ▶ нәпек, муй тәхийн нәң, нәмен, сема питум вәрен хашман вәлдәт (паспорт);
- ▶ нәпек, муй тәхийн нәң вәнләтүйлән;
- ▶ юкан нәпек, муй пәклән па муй ләнхалән вәрты (мултты мәш ки тайлан).

Карты щүңқатт хұват заявление нәпек хәншты ләнхалән ки, www.job.admhmao.ru юкан кабинет мұхты луңтәттәт мосл:

- ▶ «Единый портал государственных и муниципальных услуг» сайт тәхия нәмен хәншты мосл;
- ▶ щи ѹпийн пириты, муй тәхийн хәншман «гражданам»;
- ▶ щәлта па «услуги в электронном виде»;
- ▶ щи ѹпийн «профессиональная ориентация», щәтә нәпекәт вәлдәт;
- ▶ пириты КУ «Ханты-Мансийский центр заня-

тости населения» па тестирование нәпекн мосты уттәт хәншты;

- ▶ щи ѹпийн па нәрәтты «подать заявление»;
- ▶ щәлта ванттә, йама муй ўнтә нәпекен тывас.

Рәпата ки кәншләттәт, нынана государственной услуга хуша рәпитетты ёх пила путәртты мосл «Ханты-Мансийский центр занятости населения» телефон мұхты: 8 (3467) 32-21-88 (доб.115) муй па электронной почта мұхты нәпекәт киттә: hm4_czn@admhmao.ru.

Мосл ки, рәпата кәншты хоттәт хәннәхәя нәтләт шәкәң вәрәт ѹпийн лыпти нумас ләрамтты. Государственной услугайт рәпитетты ёх, муй мосл, иса уттәт одаңан путәртләт, иса уттәт нәтләт, муй вүрн рәпата кәншты, муй вүрн рәпата мәттә ёх пила путәртты.

Ханты ясана тулмаشتас: **Пётр Тимофеев**



Мәшәт ямәлтәты хоп Югра ай вошат хүват яңхәл,

«Николай Пирогов» нәмуп мәшәт ямәлтәты хоп – щит «Центр профессиональной патологии» хуша вәлты түтән хоп. Тәм мәшәт ямәлтәты хоп мәт оләң 1993-мит олң йинка эссәлса, щи юпийн па сыр-сыр йилуп пурмәсәтн ямиева ләштәтса. Тәм хәтл мүң Россия луваттәвн тәп и тәмәщ хоп вәл, муй тәхийн ай вошән мир ямәлтәлыйт. Тәм вән түтән хоп тәп щи вәр щира ләштәтман вәл.

Мәш ямәлтәты хопн ләштәтман вәл 19 ай хот йитые, муй тәхийн тохтурат рәпитләт, иса тата 9 тохтур па 12 ай тохтур рәпитләт.

Мир ямәлтәты хоп мәт йилуп пурмәсәт тәйл, мәта утат хүват хәннәхә мәшәт уша вәрлайт па щи мәшәт ямәлтәлыйт. Щит флюорограф па маммограф, сора щира ләштәтты рентген хушап, лабораторияйт па па арсыр мосты утәт.

Тәм олң «Николай Пирогов» Ас нопатты тыләшн мәт оләң йинка питас. Кәт тыләш мәр тохтурат 5 щурәс мәшәт уша вәрты анализәт вәрсәт, 2 щурәс хәннәхә мәшләл ямәлтәты нәтсәт.

Ханты-Мансийской район Батово вош хуша тәм хопн яңхты тохтурат кәт хәтл мәр рәпитты питләт. Щи воша яңхсәт мүң айкеләт ёкәтты ёхлүв. Батово вош – щит 19-мит ай вош, муй тәхия тәм ол «Николай Пирогов» юхтас, па лүвела тәм эвәлтала кәт пүш ёршәк вошата яңхты мосл.

Тәм ай вошн вәлты ёх кәт хәтл мәр сыр-сыр тохтурат хуша яңхләт, щит терапевтән вантлайт, иса мәшәт вантты тохтур хуша яңхләт, щәлта па гинеколог, офтальмолог, отоларинголог, невролог,



▲ Леккарәт мир ямәлтәты хопн рәпитләт. П. Молданов вәрум хур хиругр па пәңк тохтур хуша яңхты пищ вәл, щи киньща па анализәт вәрлайт.

Мүң путәртсүв Татьяна Васильевна Синько пила, лүв клинической лаборатория тохтур:

Татьяна Васильевна, муйсәр анализәт тәм мәш ямәлтәты хопн вәрты пищ вәл?

► Щит арсыр анализәт, клинической, биохимической анализәт вәрлүв. Мүң яма пилтәщман рәпитлүв лабораторной диагностика центр пила. Лыв мүнцева яма нәтләт.

Муй араткем хәннәхә нын хущана юхтыйләт?

► Тәлн 1500-кәм хәннәхә мүң хущева юхтыйләт,

щит клинической па биохимия анализ вәрты пәта, лүңән 3500-кәм хәннәхә, ол мәр ки вәнтты, щит 5 щурәс муй па бщурәс хәннәхә анализәт мүң вәрлүв.

Хүв мәр анализәт вәрлайт?

► Иса утат хәтл мәр вәрлүв, алаңая анализәт тәсыйт ки, имухты рәпитты олңитлүв, хәтл күтлуп вұша анализәт вәнтты вәрев щи етшәл, тәх щос па тәм киньща сырышәк.

Мүң вантсүв, тохтурат вәра каркама тәта рәпитләт, па щира рәпитты ён рәхл, түтән хопн и тәхийн хүв мәр ўнташ, елгы мәнты мосл, мәш ямәлтәты пәта юхтыйләт мир ар.

Айкеләт ёкәтты ёх түтән, хоп хүват яңхсәт, иса тәхетн

хәлды ўантәм, нампәр ўантәм.

Хоп кәща хә Владимир Рожко хопл амтатыюман ванләтләлә, путәртәл, муй вўрн тата лыв вәлләт, муй вўрн рүтъщәләт тохтурат па тәм хопн рәпитты ёх. Лыв хуты веттыләш мәра тәм хопат юрумн вәлләт. Теливизорән рүтъщәты хот йит, навәртты-юнты хот йит, пәсанан юнты утат тайләт.

Юхтум ёх ләты-яңышты хота тәттәясыйт, ямиева дәпәтсайт, борщ няр вуй муй па майонез пила, ая эвтум нюхи пюре пила, компот вәс. Пәсанан иса лук па пәраш вуй вәл.

Тәмәш ай вошән мир ямәлтәты хопат муй па машинайт кашән ол ямашак вәрлайт. Щи оләңән «Центр профессиональной патологии» ләнкәр тохтур хә Николай Ташланов путәртәс.

Лүв эвәлтала айкеләт ёкәтты па хәншты ёх уша вәрсәт, мәтты «Николай Пирогов» юкана еша вәл, йилуп түтән, хоп юхат.

Ин лүв Нижний Новгород хуша вәрла, щи хоп имухты нәмәсия ёх ямәлтәты хоп щира вәрла.

Путәр хәншас: **Пётр Молданов**



Вулаң мевлә посн мойләссы

Россия президент Владимир Путин мүн мүв ёхлүв государственной мевлә посн мойләслэ.



▲ Е.Д. Айпин

Тым ванан президент поступсы етас. Щата ханшман, законат пида хув мэр така па каркама рәпитты пата мевлә посн «Орден почёта» Ёмвош округ Дума кәщая нётты ләнкәр хә, увас ёх ассамблея кәща хә Еремей Аипин мойләты.

Югра губернатор Наталья Комарова Еремей Аипина ишакты непек китас:

» Мүн Югра мүв ёхлүв эвәлт государственной мевлә посн – орден Почета мойлумен пата ям ясән нәнена китлүв. Талаңа вәла, иилуп ям вәрәтвәра,

еллы па каркама вәла.

Еремей Аипин 2002-мит олн окружной Дума кәщая нётты ләнкәр хә питас. Иши олн лүв увас ёх ассамблея кәщая йис. Щи киньща па Еремей Данилович ханшты ёх союзин вәл. Лүв олән па кимат степень «За заслуги перед Отечеством» мевлә посн, «За заслуги перед округом» мевлә пос, «Заслуженный деятель культуры Ханты-Мансийского автономного округа» ишак непек тайл.

Ханты ясана тулмащас: **Пётр Аиев**

Павел Янчевич Айваседа 80 ола йис

Нижневартовской район вулаң ханнечә Павел Янчевич Айваседа вәщ тыләш 20-мит хәтлән 80 ола йис. Щит округев йис вәрәт, шуши миров культура, йис арат, моньшат тәса вәты хә.

Павел Янчевич вәлүпсәлн арсыр ушхуль, ям, мосты па лавәрт вәрәт вәсат. Йис путар хүват лүв Сорт рәт ёх эвәлт вәл, щи рәт эвәлт пүтрәт ханшты ёх, кәща ёх йисат. Лүв лаъ юпийн Аган мүвн сәма питас. Варьёган па Сәрханл вош интернатнән вәнләтләс. Ёмвошн училищайн механизатор хуята йис. Щälta армия вүсү, нәл ол мэр Тихоокеанской флот хуша служитас.

Рәт мүвла кәрлумал юпийн яң мултас ол мэр Павел Айваседа партийной тәхи кәщая вәс, вой-хүл, велләсләты тәхийн рәпитетас. Щи тумпи ар ол Нижневартовской район хүваттын шуши мирата нётты тәхийн кәщая вәс.

Сәрханл па Нижневартовской районнән партия райком хуши рәпитетас, Аган, Сәрханл район,

Новоаганск, Нижневартовской район па Ёмвош округ совет депутатата вәс.

Лүв Елизавета Даниловна имел пида вет няврәм һәмәлсәнән, интәм လүвела хиләт һәмәлты нәтләнән.

Ин вәнты Павел Янчевич рәт кәртән вәлты арсыр ёмәнхәтләта яңхийл, арсыр мирхотат вәрты нәтл. Айдат ёх пида вәйтантыйл, လүвела йис моньшат, пүтәт пүтәртәл, လүвты йис пурмасат, велпәсат вәрты, йис юнтуртән юнты вәнләтәл. Щит рәт мир вулаң ханнечә!

Яма па тәса ар ол рәпитетас, шуши мирова ар унтас түвмал пата лүв ар пүш ишакты непекәтн мойлыйлсы.

«Ветеран труда России» нәм тайл. 2021-мит олн Павел Айваседа ар ол мэр рәт мир йис вәлүпсы, йис вәрәт, рәт ясән, арат,



▲ П.Я. Айваседа

моньшат яма лавәлмал, пата Юван Николаевич Шесталов нәмпү вухән мойлупсыйн катлуптасы.

Щи тумпи лүв нәмл «Реестр нематериального культурного наследия народов Ханты-Мансийского автономного округа» тәхийн ханшман вәл.

Мүн Павел Янчевича сәма питум хәтләл, пата ям вүща ясәнән китләв! Җәнхалүв, ләнлән лүв ишиты ар ол мэр уяца-пишшән, яма, каркама ат вәс! Талаң ёш, талаң күр! Ар амат, ар иилуп вәр, уй ат вантәл!

Ханты ясана тулмащас: **Надежда Рагимова**



«Семья года» кәсупсыйн нух питсәңән

Андрей па Татьяна Ерныховңан Нуви сәңхүм район Касум вош эвәлт Россия луват вәлтү «Семья года - 2021» кәстү тәхийн, «Золотая семья России» номинацияйн нух питсәңән.

Щи вәр организационной комитет заседания пурайн уша йис.

Ерныховңан 1968-мит олн яха мәнсәңән. Тәм кәтәңән йис хәнты вәлупсыйн ёнумсәңән, ўнкеңәл-ащеңәл вўлды тайсат, велпәсләст.

Андрей Александрович дәпәт класс етшумал юпийн Пулҗават воша зооветтехникума елды вәнләтүлтү мәнәс, Татьяна Филипповна ўшкола юпийн Касумн вухсар тайты тәхийн рәпитетти питәс.

1991-мит олн пенсия ёша павтум юпийн Андрей Александрович Касумн йис пурмәсәт шавиты тәхи вәрәс, сыр-сыр йис пурмәсәт щив ёктаң. Щи вәрл етшум юпийн дўв имел пила хәнты йис вәлупсыя питсәңән, вўлды

тайләңән, хўл велләңән, воңщумут ёкәтләңән. 2010-мит ол, вўш эвәлт Андрей Александрович пўпи хотн ариты питәс, тәм хәтл Касум мўвн лўв мет араң, хә.

Андрей Александрович па Татьяна Филипповна яха 50 ол киньща ар ол вәлләңән. Вет няврәм ёнмәлсәңән, нивл хилы тайләңән.

Лупты мосл, тәмәш Россия луват «Семья года» кәсупсы 2016-мит ол, вўш эвәлт вәрты олңитса па ин кашаш ол вәрла.

Вет ол мәнәс, мүң Югра мүвеен 22 семья тәм тәхетн нух питыйләст. 2016-мит олн «Ар няврәмән семья» кәсупсы тәхийн Переясловат хотаң ёх нух питәт,



▲ Татьяна па Андрей Ерныховңан. В. Узель вәрум хур

льв Ёмвош эвәлт. 2017-мит олн «Ай вошн вәлтү семья» Сенгеповат Лянтор вош Сәрханл район эвәлт кәсупсыйн нух питәт. 2018-мит олн Ёмвошн вәлтү Ивановат «Семья – йис вәр шавиты тәхи» кәсупсыйн нух питәт. 2019-мит олн Варьёган Нижневартовской район

хуша вәлтү Казамкинат «Ай вошн вәлтү семья» кәсупсыйн нух питәт. 2020-мит олн «Иилла тывум семья» кәсупсыйн Мякишеват нух питәт, лыв Нефтеюганск вош эвәлт вәлләт.

Хәнты ясәна тулмаشتас: **Пётр Айев**

«Мань Ускве» нәмуп няврәмән кәртән

Лўң тәрумн няврәмәт вәнләтүлтү тәхиләл эвәлт рўтьщәләт, рәт мирләл пила вәйтантыйләт па няврәмәт пәта вәрум кәртән сыр-сыр вәрт вәрләт.

Сүмәтвош район хуща «Мань Ускве» нәмуп кәртән хәлум пүш няврәмәт ёкәтләйт. Мәт оләң щит вәщ тыләшн оләң хәтлән «Верәң, ёх» сменая тыв юхатсат, тата няврәмәт ёнтасләт, шүкәшләт, нюхрантләт. Лыв вухаль ёх йис пурмәсәт тунты, јох, лўвәт эвәлт вәрләт.

Вәщ тыләшн 12-мит хәтлән па смена олңитса, нәмәл «Нөл ариты йис». Няврәмәт тарнәң, йис вәлупсы щира юнтсат, юнтман мой пәнта дөльсат «Вухаль ёх хурасән нәнєе мой пәнта». Тәм тарнәң юнтты хәр

вәрты пәта ләштәйлтү мәт оләң сменайн питәт – щит ийлүп ләмәтльяты сух ёнтсат, тәюм сухдал ләштәтсат.

Пухатләхәрләйма вантты, картән сәвләл ләштәттү мосл. Юнты щирлән мәта пух картән сәвләл вәтшәс, щи хәен елды јан юнтәл. Эвет хурамән ёнтсат, иши картән сәвләл ләштәтсат.

Вәщ тыләшн 23-мит хәтлән «Кев» смена олңитса. Няврәмәт вән хәннәхәйт пила Кев мўва нух

мәнсат. Щи мәнты пәнты сырлы юмиева вәр вәтән, ёхн вантла, тәлаң ол мәр Кев мўва мәнты пәта ләштәйләт. Няврәмәт яма вәләл, Кев мўвн яңхты – щит лавәрт вәр, лывела кашаш мосты ўңк оләңән нәмәсты мосл, мултас ут па пәнән вүты јан рәхл, щирн пурмәсән лавәрт яил, шәшты күртәслән. Кев мўв хўват нух шәшты вәра лавәрт, щит хүты лапәт хәтл мәр хәртәхийн холты мосл па тәлаң хәтл мәр елды шәшты.

Тәм «Мань ускве» няврәм кәрт кәща не Любовь

Павловна Стаканова ясән щирн, тәм атум мәш оләтн няврәмәт ёкәттәштүлтү тәхийн сыр-сыр тохтурат кәншум вәрт тәса ләштәтман вәлләт, няврәмәт юмиева вантман тайлайт, атум мәш эвәлт сайләттәтәт пәта муй мосл, иса ут пәнән тайлайт.

Муй вўрн елды тәм няврәмән кәрт вәлтү питл, лўңтаты «Хәнты Манси Мир» интернет-издание хуша па мир группяятн [vk.com](#), [ok.ru](#), [facebook.com](#), [instagram.com](#), [t.me](#).

Галина Кондина хәншум айкел хәнты ясәна тулмаشتас: **Пётр Молданов**



Тунты эвәлт воңщуп па хинт ёнтлўв

Катра пурайн хәнтэт мосты пурмасат дапкайн хән ләтыйлсät, щит лыв ёнтсät па вәрсät. Ар щимäш пурмас лыв тунты эвәлт вәрәнтыйлсät. Кашаң хотн хинтäт, воңщупäт, йинлäт, анäт вәсät.

Тäm иис айдат ёх щи вәр ѣн вәләл, айкемн тäm вәр вәтшаты питсэв. Щи пäта нëмасыя ванлтупсэт вәрәнты, иис пурмасат вәрты вәнлтыйлты па айдат хүяттäт вәнлтäты мосл. Ләлн мүн шуши мир иис вәрлүв ат хäцсät па няврэмлүвн, хилылүвн ат вәсыйт.

Щи пäта Нуви сäнхум районän Ваньщавäт кәртäн мүн имет пила хинт па воңщуп ёнтты нумас вәрсүв.

Ешавәл воңщумут ёкäтты пурा щи юхäтл. Щимäш хинтäн воңщумутхүв мär шавиман тäйтä тäхл. Хинт па воңщуп ёнтты шенк әмäш, щи вера няврэмäт иши вәнлтыйлтä вәритлät.

Вәш тылäш олñитум хäтдäтн күлупн ёкäтшсүв. Щив вәрәнты нëçäт Нелли Григорьевна Пичёрская, Юлия Петровна Гын-

дышева, Вера Никитична Тимиргaleева па айдат нë Татьяна Андреевна Молданова юхäтсät.

Мүн тунты лыпäт ёнумты тылäшн ёкäтсүв, щи пäта лүв нуви хäруп, хäнши таклы ёнтты рäхл. Тәнял сүс иши вәнтатунты ёкäтты янхсүв, щитунтыйн хäнши яма тывл.

Ин имилüва тäm вәр щи мурта сäма рäхäс, лыв хинт па воңщуп ёнтуум түмпийн тунты эвәлт па арсыр хурамäң пурмасат вәрсät. Ин ѣнтä тәп лывела, няврэмлала па хилылала иши мойлupséт тывсäт.

Ин мүн сүс пурा ләвälтä питлүв, ләлн вәнта тунты ёкäтты мäнты. Эхäт па щи хурамäң пурмасат вәрты питлүв па няврэмлүв тäm әмäш вера вәнлтäты.

Валентина Ирган
китум непек щирн
хäнты ясäнäн хäншäс:
Надежда Вах



Ю.П. Гындышева



В.Н. Тимиргaleева



Хинтäт па воңщупäт етшäсät



↖ Няврэм онтупн ул. «Торум Маа» тাহи хур



↖ Л.К. Зубакина (Гришкина). Н. Вах вेरум хур

Муй щирн пушхиет онтупн енмälсыйт

Вэць тылдäш 20-мит хäтлän Ёмвошн «Торум Маа» тা�хийн «Няврэмт юнтуспээт па онтупат» эмäш ванлтупсы вэс. Щäта 30 ол мär ѣктуум, семинарт пурайн веरум онтупат ванлтäсыйт.

Музейн рэпитетти нё Ирина Ксенофонтова путäртäс, хуты лыв тäm ванлтупсыя иса округевн вэлты увась па хäтл ётты пелäк хäнтэт, вухалят онтупат вантты пäта пунсäт. Лёв арсыр онтупат олäнэн путäртäс. Мёт олäн онтуп, хулта ведщи сëма питум пушах пунлы, ёхат вэнта тэлү па юха эхäтлы.


Няврэм па кät онтуп ёнтла: хäтл мär тайты па етн онтупнэн. Эвета юнты пäта иши ай онтупат ёнтсыйт, лыв щиты арсыр мости веरата вэнлтäйлсäт.

Увась тা�хийн па хäтл ётты пелäкн вэлты хäнтэт онтупдал арсыр щирн ёнтсäт. Хäтл ётты пелäкн няврэм хäтл мär тайты онтупат ўюх эвэлт веरсыйт, атäлн улты онтупат па тунты эвэлт веरман вэсäт. Юхäн онтуп икийн веरсы, тунтäн ут — имийн. Увась пелäк хäнтэт тунты эвэлт

онтупат веरсäт. Онтупат нёмасия щирн хурамтсыйт, дäлн няврэм тäлаца ат вэс па юма ат улдäс.

Ванлтупсыйн хинт хурасуп онтуп вантсув, тэп кütгүлүн вёс эвэйтман вэл. Щи вёса няврэм омсыйлсы, мости сухдал пуныйлсыйт па ѣнкели шäнш пелка ийрийлсы. Вэнт хүват шäшман щимäш онтупн няврэм алты кён вэс. Иса онтупа сорум ванши муй па вальщам, ёлты пүнхäц сух пуныйлсы.

Ванлтупсыйн Нуви сäнхум район Түкъякäн кэрт эвэлт Гришкинäт хоттэл, ёх тäюм хэлүм онтуп вэс. Гришкинäт рёт ёх эвэлт вэлты вэнлдат ими Людмила Каллистровна Зубакина ѹи онтупат олäнэн путäртäс. Ашэл 1928-мит олн сëма питас па лёв улум онтупл иши ванлтäс. Людмила Каллистровна улум онтуплэн апшилдэл ёнумсäт, няврэмдэл, хилылдэл иши щив ултыйлсäлдэ, ёхат



↖ А.М. Тебетев хäншум хур

хилнэлдäлн юнтман тайсы. Лёв лупас:

» Тäm онтупат анкаңкемн ёнтсыйт. Ашэм улум онтуп ёнтäс, мэнема иши ёнтыйлäс, апшилдам онтупн ёнумсäт. Нэмлэм, сорум турн ѣкättы па онтупа пунты пёта минлүв пилэлэдэ нёрума яңхсумн. Щэлтэ онтупа кел ийрийлсы па ѣнки ѹи кел кўра ийрлэлэ па мулты веरл. Няврэм хэн холлдäты питл, ѣнкели ѹи кел хүват тэйнäллэ.

Ишиты ванлтупсыйн арсыр ут эвэлт веरум няврэмдэл, хилылдэл иши щив ултыйлсäлдэ, ёхат

тäсыйт. Катра пурайн лапка юнтуут ѣнтэм вэс, ѹи пёта хäнтэтарсыр утэвэлт щит веरсäт.

Хурат олюопн хäншты хäнты хё Митрофан Алексеевич Тебетев хäншум хурлдäлн иши хäнты онтупат шиваляты рäхл.

Пурмасäт шавиты па ванлтäты «Торум Маа» тা�хийн кашäн ол веरантты ёх онтупат ёнтты пäта яха ѣктыйлдäйт. Щит мосл, дäлн тäm веर ал юрэмäсэ па елдäы ат тэс.

Путэр хäншäс:
Надежда Ильина



Няврэмт яма рүтьщälät

Иса 1999-мит ол вүш эвэлт Лорвош районэн Ямал мүвн Хэнты-Муши йис кэртые хуша этнографической парк-музей пүншыс. Щи киньща щата вэлты хэнтэтн лёв нэмасыя Хэнты-Муши нэмн юкантсы. Вантэ, лёв пүнлдлн иса катра пурайт эвэлт вой-хүл велпэс ташэн тэхет вэсэйт.

Щи тумпийн ай кэртые дөн нийс вүштэйт тарум ишкү тэл хэтлдтэн иса ил ён потты лор вэл, хута Ай Ас хэлтийн хэнты ёхлүү лылэн хүлдтэй кашэн, пүш дэгүүтэй арат мушатыйлсэйт па щи унтасн лыв щимэш тэхел «мушия» тэса нэмэйтэйт. Эхэт щи тэхийн парк-музей ямсыева дэштэйт, хэнтэт «Вурна хэлт», «Лүн күтүү хэлт», сыр-сыр ёмаж-хэтлдтэй щи нийс кэртэн порилдлэйт. Иса 2007-мит ол вүш эвэлт «Хэнты-Муши» нэмуп парк-музей хуша арсыр мир хэннехүяттэй пэтаа эмэш ванлтупсэйт дэштэйт питсийт. Щив па мойлдтэй юхтыйлты хэ ёх па ненэт вэритэйт яма уша вэрты, муйсэрвой-хүл велпэсэйт унтасн хэнтэт вэсэйт-холдтэй, муйхурасуп хоттой омассэйт, муйсэр лэнхэтаа лыв иса евэлтэйт па хуты лывела поикщасэйт.

Тэмийн Хэнты-Муши кэртэн Лорвош район кэцчайт нэмасыя айлдат пухэт па эвет лүн мэр рүтьщаты тэхи пүншас, «Нохрэн пэкар» нэмн щит алъщасэйт. Щи тэхэл иса вэш тылдш олёнмит хэтлдтэй вүш эвэлт рэпиттийн пиньшас. Тэлан 10 хэлтэй няврэмт юрн хоттойт вэлдтэй, хэнты мир вэлупсы щирэта, сыр-сырвой-хүл велпэс вэрэта па ёш рэпатаита вэн хэнненхүяттэй ямсыева вэнлдтэйт.

Муши вошн Лорвош районэн вэлман, ма лыв рүтьщаты тэхедн вэлты Алла Конева (Пугурчина) пила вэйтантайлсум па

иса ар вэр вэнлтаты нендел эвэлт уша паватсум па ишшасум.

Алла Васильевна, нэн вэлупсы олжэнэнеша мэдтэй айке, путарт?

► Ма ин тэм «Нохрэн пэкар» нэмэнд ай няврэмт лүн мэр рүтьщаты тэхийн Хэнты-Муши нийс кэртэн «Муши» нэмуп парк-музей тэхийн арсыр ванлтупсэйт дэштэйт ненца рэпитдлум. Ма – тэм увас мүвэн нен. Овкэртэн Щаня юханэн сэма питсум. Аңкем-ащем вэлупсэл хуватн вүлдэх таштэн ѹнхсанэн па рэпитсэн, мүн иши иса айтэлн пэнэн тэтьясыюв. Эхэт Овкэрт вош күтүү школайн вэнлтыйлсум. Щи вэр юпийн Тэпэл вошн Д.И. Менделеев нэмуп социально-педагогической академия педагог-психолог щирн етшуптасум.

Мэта ол вүш эвэлт нэн «Муши» нэмуп этнографической парк-музей хуша рэпиттийн пиньшас тэхэлтэй тэхэлтэй вүянтсан?

► Ма иса 2012-мит ол вүш эвэлттэм хэнты парк-музей хуша ям рэпата вэр мушатсум. Па ин тэм юхи хэшум олдтэн тэв юхтыйлты сыр-сыр мирайт пэтаатэс па хурасан ванлтупсэйт хэнты ёхлам вэлупсы вэрт муй щирэлт олёнэн дэштэлдлум. Тэм лүнэн коронавирус мэш вэр унтасн тэв юхтыйлты хэнненхэ шенк шимл. Щи пэтаа ма тэтаа лүн мэр рүтьщаты «Нохрэн пэкар» ай



▲ А.В. Конева (Пугурчина). В. Енов вэрүүм хур

пухэт па эвет пила вулкемэлдлум.

Этнографической лагерь хуша 10 хэлтэй мэрн тэм пүш Муши вошан няврэмт тэп рүтьщас. Вантэ, вэвтам мэш вэр тывелт тухелт ѹнхты щирн арсыр тэхет эвэлт тэв пухэт па эвет ёкэтти ишипа ён есэлдлиюв.

Тэта мүн хэнты мирвой-хүл велпэс вэрэта па ёш рэпатаита няврэмт вэнлтэллүв. Хэ ёх пухэт пила холдлэлт омаслдэлт, хүл велпэслэлдэлт па арсыр хуррамэн пурмасэлт ѹх эвэлт тэса нюхэрдлэлт. Эвет мүн пилэва иса тунты эвэлт арсыр андт-сэндт вэрдлэлт, щашкан, нэй, пүнэн сух пила ёнтасты яма лывел па вэнлтэллүв. Айлдат хуватта хүл ваньшты па сыр-сыр лэгүүтэй тэхэлтэй тэхэлтэй вэлупсы щирэлн щи вэртэйт тэса ат вэрсэйт. Щэлтэй няврэмт нэмасыя арсыр увас ёх кэсупсэта хушлүв, щит

щимэш утэт: ёхал эвэлт нэлдэлт поса есэллүв па күсү лакэт юврая ювум ѹх тэя ёвэллүв, щолн ияха юнтлүв. Вүлдэх таштэн вэлум хэ ёх вэнлтэлдэлт ай пухэт муй эвет тыншэн тэса вүлдэх онготаа вущкытэй па эхал шэри ар пүш навармас. Вантэ, вэн воштэн ёнумты няврэмтэй иса кашэн ай муй вэн вэр хэнты вэлупсы олднэн шенк эмэш уша паваттвы.

Ма па ванлтупсэйт «Муши» нэмуп парк-музей хуватн ай пухэт па эвет пэтаа дэштэлдлум. Няврэмтэй, ма нэмэстэй щирэмн, эмэш хэлдэнтэй, муй щирэн катра хэнтэт хүл велпэслэлтэй, муйсэр хүлдтэй тэм Ай Асн вэлдлэлт. Мэта хүл няртэйн юхи дэты рэхл, мэта ут тэп кавартты мосл. Ма щирэмн, тэмэш рүтьщаты тэхи лүн тылдэлт мэр шенк вэн унтас няврэмтэй тэл.

Путэр хэншас: **Владимир Енов**



▲ Вәйтантупсыя юхтум имет

▲ Көпәлә тәнәлләт

Вухаль имет вәлүпсы

Вухаль ими – щит тәс вәртутән, хотл юма тайты нә, сәмәң әңки па ими. Ими вәлүпсыйн арсыр щирәт вәлляләт, муй рәхл вәрты, муй ән рәхл, муй щирн вәлты мосл, щи вәрата лүв эвидал, хилнәла, вәнләтәслә па щиты лыв вәсат. Тәмхәтл айлат эвет ән ләнхаләт шенк вән хуята хәләнты, лыв щирлалн вәлләт. Па, ләлн эвет юм ненәта па имета ат йисат, ёнтасты па вәрәннты вәр щирн лывел, єнмәлты мосл.

Тәм ол вәщ тыләш 9-12-мит хәтләтн Сүмәтвош районан Ясунт кәртән няврәмәт рүтүшәт «Мань Ускве» тәхийн лапатмит пүш «Кочующая школа» вәр ләщтәйләс. Хута ўктәшум имет па айлат эвет шүкщәсәт, вүлә сух эвәлт арсыр әмәш пурмәсәт вәрсәт па ёнтсәт. Па тәм йис атум мәш пурайн шүкщаты вәр кәт щира ләщтәтсы. Щит оләң пүш вәнләт имет ўктәшийләсәт, кимит пурайн – айлат эвет.

Тәм ол шәп мәр Саранпауль, Ләв, Хулымсунт кәртән ненәт вухаль түтшәң хират ёнтсәт. Вәр етшуптум артән уша вәрсәт, хуты лыв ёнтум углалн па кәт хир ән тәрумл.

Щит «тучан сүнт хүрыг», хәнты ясәнән ки лупты түтшәң хир ов хуши вәлты ай хире па хә акань, мәтә ут пеши сух эвәлт ёнтлы. Тәм ай хире түтшәң хирн тайсы, щәта арсыр ёнтасты щүнкәт, щашкан, нәй, вой

сух шәпиет, сәкәт тайсыйт. Муй ёнтасты вәр эвәлт хашл, иса щив пунсы.

Иса вәйтантупсыя 18-кәм хуят юхтыләс. Кашәң нә лүвела түтшәң хир ёнтас. Олнәлн имет вет хәтл мәр вүлә сухәт йинкән лустәсләд па хәтл мәр сорәлсәләд. Щәлтә ётлуппийн ямсыева пүндал нух вүсләд, щәлтә тәнләсәләд.

Кашәң нә лүвела мосл турамн ёнтум хирл хурамтсәлә.

Щи юпийн акань вәрты пәта нәплүв сух ләщтәсәт па хәтл мәр хә аканяят ёнтсәт. Тәмәш акань иши түтшәң хир лыпийн тайты мосл.

Ас-угорской институтт рәпитетт исторической наукаит кандидат нә Светлана Попова «Духовный мир мансийской женщины» хәншум путәр па па нумсәң непекәт лүнәтсыйт.

Әхат тәм ўшкола пурайн тывум вәрәт няврәмәт пила ләщтәсыйт. Лыв «Мань Ускве» тәхийн вәщ



▲ Имет ёнтасләт

тыләш 12-19-мит хәтләтн рүтүшәсәт. Айлат ёх пила вухаль мой оләнән путәртсә па итәх мой вәрәт ләщтәйләсыйт.

Эвет ушамат ёнтсәт, картаң сәвәт вәрсәт, вәнләтәйләсәт, муй щирн щиттәт тайты рәхл. Лыв арсыр лыптәт па ваншет пила шай кавартсәт, ай кәрн нянь вәрсәт, ёнтассәт, арат вәнләтәсәт. Лыв иса вәнләт ёжн вәнләтәсыйт, хутыса түн-щирәң па мосты щирн

кашәң вәр вәрты. Муй айлат эвия рәхл вәрты, муй ән рәхл.

Вән пәмашипа ясән Елена па Геннадий Тимченко фонд хуята Тюмень вош эвәлт ләнхаләүв лупты. Лыв мүнәева юм нәтупсы вәрсәт.

**Евгения Выоткина
хәнты ясән тулмаشتас:
Надежда Вах**



Няврэмт 10 щурас шойт вухн сухуптэййт

Россия мёв хон ики В. Путин поступсы щирн Пенсионной фонд тэхи эвэлт вэнлтыйлты няврэмт тайты хоттөл ёх 10 щурас шойт вухн сухуптэты питэййт. Щи пята вохты непек Госуслуги тэхи мухты китты рахл.

Ямкем арат хоттөл ёх Госуслуги тэхи мухты пищмайн китсийт. Лыведа тэп мосл вантты, түнширина муй ёнтэ непект хэншман вэлдэйт па юхлы Пенсионной фонда щи пищма китты.

Тэм нётулсы вух 6-18 тал, луват няврэмт тайты хоттөл ёха мэлдэ. Па мосл, лэдн няврэм лыгтэ хотты

тылдэш олднит хэлтэ вэнтэ б тэла ат йис па вэц тылдэш 3-мит хэлтэ юпийн – 18 тэла. Ишти щимэш нётулсы вухатн кэши мэш тайты айлат хуятт сухуптэййт па лэдн лыв 18-23-миттэл аттисгтэ па хулна вэнлтыйлдэйт.

Анкет-ащет тумпи шэкашты няврэм ёнмэлтэ вьюм хуятт иши щимэш

вухн сухуптэййт.

Вохты непек Ас потты тылдэш олднит хэлтэ вэнтэ хэншты мосл. Щи юпийн вет хэлтэ мэр щит нух вантты па арталаты питэ. Иса ки непект яма хэншман вэлдэйт, хэлум хэлтэ мэр, тэп вэйт дор тылдэш 2-мит хэлтэ юпийн, вухат счёт тэхия пунлыйт.

Мултэ хоттөл ёха

щимэш вухат вуты ён рахл ки, ђи олднан иши непек китдэ.

Тэп заявления непекн нын лицевой счёт номерн хэншты. Вухан картайн номер хэншты ён мосл. Па ђи лицевой счёт номер тэп ёнкийн муй па ацийн аттэйлдэ. Па рэт ёх номер Ѣив хэншты ён рахл.

Валентина Узель айкел хэнтэ ясана тулмащтэс:
Надежда Ильина

Тухлэн хопат латты тэхийн рэпитл,

Тата мосванэн Сүмэцвош эвэлт тэс айкел юхтас, хуты айлат хэ тухлэн хопат латты тэхийн рэпитл. Щит Роман Викторович Ананьев, лув кэт финно-угорской мирнэн күтн ай тэхет потты тылдэш 20-мит хэлдэлн 1989-мит олн Сүмэцвошн тэм нуви тэрүм илпия юхтас па иса айтэлн Ѣата вэс па ёнмэс.

Ма щирэмн, мосл лупты, хуты лув иса пурайт вүш эвэлт Вынгилеват вухаль миранта лүнгэстэ хэннэхуятт эвэлт вэл. Лыв опраш ёхдал тэм увас мүвева хүвн юхтас т па Вынгилеват нёмуп кэртэл тата лэштас.

Тэм айлат хэев ёнкел, Ирина Константиновна Вынгилева, вухаль ими, ащел па Виктор Евстафьевич Ананьев – Ѣит мари мир хэ.

Лын Роман пухан иса 1997-мит ол вүш эвэлт Сүмэцвош күтуп ёшколая вэнлтыйлты яхас. ёшко-ла ешуптумал вэр юпийн Россия хон пелэк мёвэлт давэлтэ яхас. Лув Волгоград вэн вошн разведка батальон тэхи хуша иса 2008-мит ол вүш эвэлт па 2009-мит ол вэнта служитас.

Итэх армиян вэлум айлат ёх Ѣи вэрэл ѿ-

сыева ешуптумел юпийн имухты рэпата лыведа мущатлдэйт. Роман па шенк мосты па сэмэн вэр лувела Сүмэцвошн вэйтас па 2009-мит ол вүш эвэлт «Ютэйр» нёмуп авиакомпания тэхийн авиационной безопасности арталаты хэннэхэ Ѣирн рэпиттэ питэс.

Арсыр вэрэт тэса лэштэти пята ишипа елды вэнлтыйлты кашан хуята мосл. Щи пята Роман заочной Ѣирн Тюмень вошан университетн иса 2011-мит ол вүш эвэлт па 2017-мит ол вэнтэ ѿ-сыева «таможенное дело» Ѣирн вэнлтылдэс па иса сёма питум рэт мёвэлн рэпитэ. Ин лув Сүмэцвош филиалн АО «Сэргханл аэропорт» хуша тывелт-тухелт яхты хэннэхуятт па лыв тэтиялты пурмэсдэл вантмэн па арталуман тайл.

Тухлэн хопат мэнты пурайн Роман арсыр хэйт па нёнтэ пила рэпитл.



▲ Р.В. Ананьев хоттөл ёхдал пила

Юхи хэшум Ѣосн рахл лупты, хуты сыр-сыр оса вэрэт тэм хэев ишти лэштэл. Щиты ван хэллуп тылдэшн 2020-мит олн лув айлат ёх «Югра мёвев лылнууптэты» тэхи кэцэя Сүмэцвош районэн паватсы.

Кашан вэр хуша тэм вухаль хэев хоттөл ёхдалн иса кашан пүш нётлэй.

Любовь Вынгилева
китум айкел
хэнтэ ясана тулмащтэс:
Владимир Носкин



Анными

Анна имаев хотл щикүш хотхәрәл ванкүтләй ән люхәтсәлә. Лүңән хотхәри ванкүтләй люхәтты шир әнтәм, щи тумпи ар вәр вәл. Анными пурмәсәлә, анлал, ләмәтсухдал юма пунман тәйсәлә, ләваса хән вущәсәлә. Сухдал вүсәнца ки йисәт, юлупн юлсәлә. Щи оләтн юлупты пәта нәмхүят ән няхәс. Кашәң хоттөл ёх хуши имет ләмәтсуха юлупты ёнтсәт. Мәт юма вантман сопекләл тәйсәлә, щи пуряян лапкайн ләмәтсух па сопек ләваса ән тынысы. Сопекләл њымсыева люхәтсәлә, хопл, эвәлт вүты шәшман ваншия мәнхәлә. Щәлта ләпәң ов елпийн ил омәсл па сопекләл хулт єнхәлә, сопек лыгия лүнүм турнәт, тәпрат эвәлт нух пәркәтләлә. Щи љипийн ләпәңца сорәлтү пунләлә. Хошум етнәтн ким түтъюх пая пуныйләлә, ёлах пурайн па юлн кәр әхтыйн сорсәт. Ил улты пура вәнты ванкүтләй вантийләлә, сорсәт муй әнтә. Вүсәнца ки йисәт, решин юлупн юлсәлә. Йилуп сопек ләтты щи пурайн лавәрт вәс па шимл тыләш вүх ёша вүсәт. Щи пурайн имет вәнтән әнхәсәт, ырапакләсәт, щи пәта күр ләмәтсух юма тайты мосәс, ләлн кашаңа ал ыиты. Вудаң лаљ пурайн Анными кәртән имет пила ырапакләсәт, итәх пурайн ләелдү вәсәт. Щи вүш эвәлт ләмәтсухдал шалитман тайты вәнләс.

Ай пура и лүң хәтл оләңән хәншты ләңхалум. Анными аләң ким әтәс, ай кәрәл алсәлә, шай кавәртәс. Юхи лүңәс па лупәс, хуты ўм хәтләң хәтл питл. Мин Неля асәвәм пила нух кидумсүн. Мин хүв ән әк-



▲ А.К. Салтыкова

тәшсүв, ешавәс нык щи мәнсүв, ай хопа ләлсүв, турн сэвәртты хәра тәсьюв. Хән тәмәш хәтләт оләңән нәмәлмәлүм, сәмәм хуши щикем хошум па јам. Аләң вүш эвәлт етәр хәтләң хәтл, вот иса әнтәм. Неля асәвәм Анна имаев пила лөвәлләң, ма па хоп сәвәс омәслүм, ләпн сәвәс каталлум. Мин Неля ёмни пила ариты, путәртты ләңхадман, тәп Аннымевн ән есәлдүюв. Йинк хуши ўвты па сыйяңа путәртты ән рәхл. Мин айлтыева арилүмн: «Ләпиәм – пулпул, Хопиәм – тюл-тюл».

Ешавәс ай лора юхатсүв, холуп вантсүв. Холлев катрая, вүсәнца юис, тәп хүлн хойсы. Мүң нух амәтсүв, кәт-хәлүм сурәх иши хойс. Анна имаев холпәл вантман айлтыева путәртәл: «Йилуп хүләье, тынәң хүләье, сорнең јам хүләье». Лорн ай вотые пүл, щи пәта пөлңа шенк әнтәм. Мүң мәт вәншәк сурәх вүсүв, па ләпа пунман нух няхәссәв. Щәлта ләпев йинкән пулщемәсәв па щи сыйстама юис. Щив няхсүм хүләв пунсәв, эвәтсәв. Питы нянь, сул нух талсүв па няр хүл ләсүв. Щи мурта епләң хүләье! Мухалая па



▲ Карина Кантерова хәншүм хур, Русскинская кәрт

тәп иса йинк кәл, сурет йинка мәртәтльяты сый сашл, васәт пәрләтлюман яңхләт, йинк лухщемәтү сый хәләнтлүв. Щи пура сәмәм па нумсәм хуши веккеши хәщәс. Интәм вәнты ма ар йитуп вошәң хотн вәлты па рүш ләтут ләтү кашем иса әнтәм. Щи юкана ма хүләье питы нянь пила ләлүм – ма пәтәм шит мәт епләң ләтут.

Па ләвмев љипийн турн хәра щи мәнсүв. Сорашәк рат хәрәлсүв, шай пүт, хүл кавәртты пүт эхәтсүв. Ешавәс пүтәв па шаев щи етшасән. Хүл хошум йинк па шай яньщсүв па рәпитети щи мәнсүв. Аннымев турнандал күншты питсәлә. Мин ләтутлүв юха нух эхәтсәлүв, ләлн Ләпка

ампевн юхи ал ләсыйт па имаева нәтты питсүн. Лүв минэв шенк рәпитети ән партасәлә, ешавәс вева щи йисман па пана мәнсүн, әня лыптат әкәтсүн, йинк хүват шәшийлсүн. Щәлта рат хәрәлтәт пәта түтъюх тәсүн, шәмшән шай кавәртты пәта шәмши лыптат әкәтсүн, ай хопа түтъюх ләлсүн. Щиты щи хәтләв мәнәс. Юхлы ёшев кеншәк вәс, ув шәншән мәнсүв. Хоп күтүпн турн мунтал уләс, хоп нюла түтъюхәт ләлсүв. Щикүш вева питсүв, тәп ям нумасн юхи йисүв, щи арат вәр вәрсүв, Аннымева нәтсүв. Хәтләв нәртамлы ән мәнәс.

Антонина Ледкова
хәншүм путәр
хәнты ясәнә тулмаشتас:
Надежда Молданова



Апрәң, хәрни

Имултыйн нампär войе яңхäläл па тывөлт-тухөлт ѫл наврумтыйл. Щиты навартал, күтн мув хуша вәнт вой нюхи пүлье мущатл. Тәп ләтү пиньшäл па щи кәмн нәмәлтä вурна ненчän үвн алуимла:

— Варх, варх, варх, варх!

Ин войлөнки вурна именчän така пурэмäлä, лув нюхи пүллäл па нух нярэмäлä, па щиталн вурнäен ел, пэрлумтäл па сорашäк вәнши ѫх тыя нух латумтäл.

Щи киньща нампär войлөнкие мойпär икел хуша мэнл па ин лувел щиты Ѣи поиклäлэ:

— Акем ики, вурна ненчän ма мущатум нюхи пүлэм нух нярэмäсä, ширн ма тамхäтл иса ѣн па лаңтыйлсум!

Вурнаен еша елнашäк ѫх тыя омäсл, мätтү ки ненмулты ѣн хәлдäл па тәп щиты еллы үвәл:

— Варх-варх, ма мущатум нюхем, ма мущатум нюхем!

Ин акел ики ел Ѣи лыкашäл:

— Муя нәң, тухләнвой, айвой кетумлән?

Тумел па иса лувела ѣн хәлдäнтäл. Ин ики мёт-мёт Ѣи лыкашäа йил па Ѣалта сыр-сыр илта яңхты войт ияха ѫкäтлäлэ. Щиталн ин мирхотäлә ѫктäщум войлала хон икен щиты Ѣи луппäл:

— Ёх, хәлэвт тухләнвойлув пила лаъл вөрлүв! Лыв, вантэ-са, ин мүн апщева кетумсäт па ма ясäнлама иса ѣн па хәлдäнтäл.

Ёхлапиля вәйтантыймал, вөрлэл юпийн илта яңхты войт хон ики күрк икел вана вохал па лувела ѡимäш айкец вөрлэл:

— Нәң, күрк ики, тухләнвойлән ѫкäтлән, ма па — илта яңхты войт. Аләң, хән хәшäл ётäл, мүн ных пидана далясты питлүв!

— Лыкашäл, щиты ки, щиты, — күрк икен юхлы пёлэл лувела нёхмäс.

Щи вөр юпийн лув па ләнкäр ѫхлала айкец тәл, хуты илта яңхты войт хәлэвэйт лувела лаъл вөртэ питлүт.

Щи киньща Ѣалта күрк икен тухләнвойлал пёлэл таңа ѫвэлтäл:

— Ин па, ёх, иса ил улаты парүтшäты, патлама Ѣи йис. Хәлэвэйт, аләң хәшäл, мүн хульяева илта яңхты войлув пидалалясты мэнлүв!

Щи киньща Ѣищкет па тухләнвойт мэркäлдäлн лаъл ланкäссäт па ил улты лэшшäтйлсäт. Илта яңхты войт иши мув хотдäл лувийн ил улсäт.

Тәп мойпär икен ләнкäр ѫхлала пила ѫл омäсл па ненчän, мүн ширн хәлэвэйт лыв далясты питлүт. Щи кәмн лув щиты Ѣи путтäртäл:

— Ёх, ных нәмсäяты-са, муй ширн күрк икен ил вухлätäты ин рäхл? Лув, вантэ, мёт вән па ѫрэн тухләнвойт күтн. Лувел ки мүн щомлы вөрлүв, щитнүх Ѣи там лаълн питлүв!

Ин войт ненчäсты Ѣи питсäт, мäта войе лыв күтэлн мёт кеншäк па апраңшäк?



— Я-а-а, — луппäт, — хәрни войт мёт кен па апраң, лув пёнкдäл мёт пäстэт!

Щи киньща хәрни войе ин иккийн вана вохла па Ѣи пäртла:

— Нәң, хәрни, айлата күрк икен улты ѫх тыя нух хәнхä-са па ин тухлäл күншäл пёнкäтн кäтна эвтäн! Щи пурайн, вантэ, лув нух пёрлätы ѣн вөрлэл па ил рäкänl. Лув ки ил рäкänl, мүн там лаълн нух питлүв.

— Я, лыкашäл, айлтыевава Ѣи вөрэм вөрлөм, — хәрни ин икела нёхмäл.

Щиталн хәрни айлтыевава күрк икел омäсты ѫх тыялн нух хәнхäл па тухләнвойт хон ики күшнäлдäл пäстти пёнкäтн шäпи Ѣи луврэмäллү. Щи апраң айвой ишиты шитамн ѫх эввэлт ил вухлäс па мойпär икела Ѣищты луппäс:

— Я Ѣи, акем ики, ма вөрэм вөрсэм!

Щи вөр хәлман хон ики ләнкäр ѫхлала партäл:

— Ин па хульяева ил улдаты па лаъл елпийн еша ямашäк рүттäшäт!

Хув муй ван күт пäрäc. Еша вәл алән хәшäл ётäс, па мойпär ики илта яңхты войт нух Ѣи күрятäс:

— Я-а-а, ёх, сорашäк хульяева нух килаты, далясты ин Ѣи питлүв!

Щи киньща күрк икен иши нух вөрлäс па ѫх тыял эввэлт ненчäсäя така ел, ѿвэлтäс:

— Тухләнвойт, нух пёрлätы-са, па далясты хульяева лэшшäтäяты!

Щи киньща Ѣищкет па Ѣи вөрлүтэ пёрлумты вүтшäт па ѫх тыял эввэлт иши күрумн мувва ил рäкänl. Щи апраң айвой ишиты шитамн ѫх эввэлт ил вухлäс па мойпär икела Ѣищты луппäс:

— Ей, хон икев Ѣи велсы!

Щи киньща тухләнвойт елды хунтасäт па иса хульяева даакки пёрлäсäт.

Мойпär икен ѫхлала ияха ѫкäтсäлэ па Ѣалта Ѣищты Ѣи лувела луппäс:

— Ёх, там лаълн мүн тәп хәрни воев унтасн нух питсүв! Лув Ѣищкет айвой илта яңхты войт күтн ѡимäш апраң войт па ѣн тайлүв! Мүн ин лувела тамхäтл тәп вән пёмашипа яснäт луппäв!

Владимир Енов
йис ханты ёх пүтгäт хувбäн ханшум моньшäл



▲ Л.Н. Бизина



▲ Ненят сак веरдат

Ненят щашкан сух эвэлт түрлөпсэйт веरсайт

Тэм ванэн «Хэтлые» нэмпи хоттөл ёх күлуп кэща нे Ирина Фирсова ханты мир пурмасыт шавиты «Нуви ат» тэхийн имет яха ёктылдэс. Лүв щив юхтум имета ванлтас, муй ширн щашкан сух эвэлт түрлөпсэйт веरты рахл. Щи пята нэмасыя «жмурунение» па ширн «стяжки» нэмпи веर вэл. Хэн щашкан сух яха талды па щит эвэлт сак веरлы.

Лүв тэм ущхуль веर интернет хуват вантас па вэнлтыйлдэс. Щалта нумасын юхатсы Ѣи эмаш веера нендал вэнлтаты.

» Тэмхэлт мүн партлыюв арсыр йилуп веरт па ширтэгтэй, — лупайл Ирина Кузьминична. — Щи пята арсыр йилуп ущхуль веरт па кэншлүв. Ма нэмэслум, хуты щит мёт ям, мүн иши вэнлтыйлдлүв мулты па ут веरты, йилуп ширтэга вэнлтыйлтэй. Мэнэма па юхтум имидама щит шенк

мостайл па сэма рахл.

Вэйтантупсия юхтум имета тэм веर шенк эмшэвэс. Лүв күтэлн пугартман йилуп веера вэнлтыйлдэс. Щи веर етшуптум юпийн кашаң не лүв веरум сак келдэл ванлтасэдэ.

Ваньщавт кэртэн, не Руфина Гришкина тэм веर олёнэн интернет хуват уша веरас. Лүв ай няврэмтэд авалтты па вэнлтаты хотн рэпитэд па арсыр йилуп веरт олёнэн уша верл, па вэнлтыйл. Лүв хэншас,

хуты Ѣи эмаш йилуп веера вэнлтыйлтэй, дэнхал па щив Ѣи вохсы. Руфина Прокопьевна тэм йилуп веरанттэй веर шенк мэстэс.

Любовь Бизина иши арсыр йилуп веरата вэнлтыйлтэй тэс не, арсыр мастер-классын вэлдял. Лүв Тэк эвэлт, ин Нуви санхум вошн вэл па иса щимаш вэйтантупсэта янхийл.

Ирина Фирсова
китум непек ширн

Путэр хэншас:
Надежда Вах



▲ Р.П. Гришкина

Ханты ясанг
(Хантыйское слово)
№15 (3579), 05.08.2021

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Врио директора, главный
редактор – **Кондина Г.Р.**
Телефон (3467) 33-36-82

Заместитель главного
редактора – **Вах Н.И.**
Телефон (3467) 33-24-02

Ответственный секретарь –
Рагимова Н.В.
Телефон (3467) 33-24-02

Адрес редакции и издателя:

628011, г. Ханты-Мансийск,
ул. Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, 14.

Индексы 04393, 54393

Тираж 2166 экз.
Заказ 3364
Цена свободная

Газета
зарегистрирована
Управлением Федеральной
службы по надзору в
сфере связи,
информационных технологий
и массовых коммуникаций по

Тюменской области, ХМАО-
Югре и ЯНАО.

Свидетельство о регистрации
ПИ №ТУ 72-00796
от 23 января 2013 г.

Мнение авторов публикаций
не обязательно отражает
точку зрения редакции.